

Laksana transformasi perundangan rasuah selepas bentuk kerajaan – Pakar

Ekhwan Haque Fazlul Haque
Oktober 25, 2022 @ 1:23pm

Kuala Lumpur: Reformasi undang-undang berkaitan rasuah antara yang perlu diberi perhatian oleh kerajaan yang bakal dibentuk selepas Pilihan Raya Umum ke-15 (PRU-15).

Pengerusi Institut Kefahaman Islam Malaysia (Ikim), Prof Emeritus Tan Sri Dr Mohd Kamal Hassan berkata, rasuah yang semakin membarah dalam negara kini hanya akan menyebabkan Malaysia terus terjerumus dalam kancah kehancuran.

Menurutnya, keadaan itu akan menyebabkan ahli politik sudah tidak lagi dipercayai, malah dibenci masyarakat.

"Politik adalah panglima yang akan menentukan hala tuju negara dan jika rosak (politik), maka rosak negara.

"Politik kini menjadi alat perebutan kuasa dan alat menghapuskan kuasa, malah di Malaysia sudah hilang sifat malu (menerima rasuah) kerana sifat itu dianggap nilai terpenting dalam akhlak Islam.

"Selepas PRU-15 ini, diharap akan ada perubahan dalam struktur perundangan yang membawa transformasi dalam menangani isu rasuah khususnya membabitkan ahli politik," katanya.

Beliau berkata demikian dalam Syaran Ulung Buku 'Korupsi dan Kemunafikan dalam Politik Melayu; Perlunya Disegerakan Transformasi Moral Etika' hasil tulisannya di Menara Kuala Lumpur di sini, hari ini.

Mohd Kamal berkata, sistem pendidikan juga perlu menerapkan nilai menolak rasuah kerana pembentukan jati diri seseorang perlu bermula di awal usia.

Menurutnya amalan menolak rasuah dilihat sebagai pembelajaran jangka panjang untuk seseorang memahami kesan dan implikasi, jika aktiviti itu dijadikan sebahagian daripada gaya hidup.

Sementara itu, Ketua Pengarah Ikim, Profesor Madya Dr Mohamed Azam Mohamed Adil berkata, isu rasuah sudah terbukti menyebabkan runtuhan tamadun hebat dunia kerana tidak seiring dengan akhlak dan kepentingan moral pemimpin.

Katanya, kelunturan pegangan agama dan nilai murni menyebabkan maruah bangsa dihumban ke tahap paling rendah.

"Hari ini tiada negara Islam yang menjadi negara maju walaupun mempunyai sumber alam yang banyak.

"Sebaliknya negara didiami umat Islam hanya dikenali kerana kemunduran, pergolakan, rasuah dan urus tadbir lemah," katanya.